



## XUNTA ELECTORAL DE GALICIA

**Asunto:** Acordo da Xunta Electoral de Galicia, do 29 de xaneiro de 2024, polo que se resolve a denuncia do representante xeral de Democracia Ourensana por trato discriminatorio na celebración do debate electoral organizado pola CRTVG (RE 317/2024).

A Xunta Electoral de Galicia, á vista dos seguintes

### ANTECEDENTES

1. O 23 de xaneiro de 2024, o representante xeral de Democracia Ourensana formaliza denuncia por trato discriminatorio na celebración do debate electoral organizado pola CRTVG (RE 317/2024).
2. O 24 de xaneiro de 2024, logo da reunión da Xunta Electoral de Galicia, trasladóuselle á Dirección Xeral da CRTVG (RS 656/2024) e aos representantes xerais das formacións políticas convidadas ao debate (RS 657/2024 a 661/2024) copia da denuncia, aos efectos de formular alegacións. Deste traslado deuse coñecemento ao representante xeral de Democracia Ourensana (RS 662/2024).
3. Cumprindo o trámite concedido, o 25 de xaneiro de 2024, a CRTVG formulou alegacións (RE 333/2024), argumentando os motivos polos que considera que os feitos denunciados non infrinxen a normativa vixente de réxime electoral.

### FUNDAMENTOS XURÍDICOS

**Primeiro.** Os plans de cobertura informativa dos medios de comunicación de titularidade pública en período electoral deben responder aos principios de pluralismo político e social, igualdade, proporcionalidade e neutralidade informativa na programación, como esixe o artigo 66.1 da LOREX e desenvolve a Instrución 4/2011, da Xunta Electoral Central, do 24 de marzo, sobre interpretación deste precepto no relativo ás garantías de respecto aos principios subliñados.

**Segundo.** Estas garantías de respecto se plasman, entre outros extremos, no establecemento dos recursos contra os plans de cobertura informativa, regulados no apartado quinto da precitada Instrución, e contra as actuacións e programas emitidos con incidencia electoral, consonte o apartado sexto da referida instrución .

**Terceiro.** A doutrina da Xunta Electoral Central aplicable, no que eiquí interesa, sinala que:



## XUNTA ELECTORAL DE GALICIA

— Os principios de pluralismo político e social, igualdade, proporcionalidade e neutralidade informativa implican dar un trato similar ás formacións que se atopan en similar posición ante o electorado “*como consecuencia dos resultados obtidos nas últimas eleccións equivalentes ou como consecuencia da súa consideración como grupos políticos significativos*” (Ac. do 21 de maio de 2019).

— As funcións das xuntas electorais en relación coa cobertura da campaña electoral polos medios de comunicación de titularidade pública, como sinala o artigo 66 da LOREX, “*limitase a resolver as reclamacións e recursos que as formacións concorrentes ás eleccións poidan presentar contra as decisións dos órganos de administración dos referidos medios*”.

*En suma, “a súa competencia circunscríbese a decidir se as actuacións impugnadas polos representantes das candidaturas vulneran os principios de pluralismo político e social, igualdade, proporcionalidade e neutralidade informativa, expresamente garantidos polo artigo 66 “ (Ac. do 26 de maio de 2019).*

— A non competencia das xuntas electorais “*para resolver sobre feitos xurídicos hipotéticos ou futuros ata tanto estes non se produzan*” (por todos, Ac. do 7 de xullo de 2022).

**Cuarto.-** No presente caso Democracia Ourensana presenta denuncia polo trato discriminatorio na celebración do debate electoral organizado pola CRTVG.

Esta Xunta Electoral, vistas e comprobadas as alegacións formuladas pola Corporación de RTVG, como ten reiterado a Xunta Electoral Central (Ac. 16/05/2005, 4/2/2021 e 7/7/2022) non pode pronunciarse sobre feitos hipotéticos e futuros, polo que, como a denuncia se presenta o pasado día 24 de xaneiro cando non estaba remitido a esta Xunta electoral o Plan de cobertura informativa da CRTVG, que -segundo se recolle na Instrución da Xunta Electoral Central 4/2011, do 24 de marzo- os órganos de dirección dos medios de titularidade pública someterán ás Xuntas Electorais competentes os seus plans de cobertura informativa da campaña electoral, nos que incluírán os debates, entrevistas e programas específicos de natureza electoral que pretendan realizar, así como os criterios sobre a información específica relativa á campaña electoral, polo que non resulta posible materialmente dar cumprimento ao solicitado.

Polo demais a condición de grupo político significativo recoñécese a “*aquellas formacións políticas concurrentes a las elecciones de que se trate que, pese a no haberse presentado a las anteriores equivalentes o no haber obtenido representación en ellas, con posterioridad, en recientes procesos electorales y en el ámbito territorial del medio de difusión, hayan obtenido un número de votos igual o superior al 5% de los votos válidos emitidos*”, como así preceptúa o apartado cuarto.2.3 da Instrución da Xunta Electoral Central 4/2011, do 24 de marzo. Requisito que non reúne Democracia Ourensana xa que a formación política recorrente non obtivo en posteriores procesos un número de votos válidos igual ou superior ao 5% requirido, concretamente nas pasadas eleccións municipais de 2023 obtivo no ámbito da Comunidade Autónoma de Galicia 12.411 votos válidos, o que supón unha porcentaxe dun 1,34%. Engadir, por último, que esta formación política só concorre no proceso electoral en curso na



## XUNTA ELECTORAL DE GALICIA

circunscrición electoral de Ourense (candidaturas proclamadas publicadas no DOG núm. 16, do 23 de xaneiro de 2024).

Consecuentemente, adóptase o seguinte

### **ACORDO**

O arquivo da denuncia.

En execución do presente acordo, e para o cumprimento do disposto no art. 21.2 LOREX, desenvolvido pola Instrución da Xunta Electoral Central 11/2007, do 27 de setembro, comunícolle que contra el poderá interpoñer recurso de alzada ante a Xunta Electoral Central, que deberá presentarse ante esta Xunta Electoral de Galicia, para o seu informe, antes das 18:30 horas do próximo día 31 de xaneiro de 2024.

O recurso poderá presentarse por correo electrónico no seguinte enderezo:  
[xunta.electoral.galicia@parlamentodegalicia.gal](mailto:xunta.electoral.galicia@parlamentodegalicia.gal)